

हिनकनी ते बिलकनी

गिद्दड़	थम्होना	हड्ड	कि'लदा
बौहंदा	अद्धबशकार	ढिड्ड	

इक बारी दी गल्ल ऐ, इक गिद्दड़, ऊटै कन्नै मित्तरी पाइयै नदी पार कक्कड़िये दे खेत्तरें च चोरी कक्कड़ियां खाने दी सलाह बनांदा ऐ ते ऊट बी हां च हां मलाई दिंदा ऐ। ते फही इक दिन गिद्दड़ ऊटै दी पिट्ठी चढ़ियै नदी पार जाई पुजदा ऐ। ते डोल गै दमैं जनें कक्कड़िये दे खेत्तरै अंदर जाई बड़दे न ते लगी पौंदे न कक्कड़ियां खान।

थोहड़े चिरै मगरा गिद्दड़ ऊटै गी गलादा ऐ, “भाइया नंद आई गेआ ई, मेरा ढिड्ड गेआ ई भरोई। ते मिगी हून लगी ऐ हिनकनी औन।’ तां बचारां ऊट लहीमीं कन्नै गलांदा” यरा, मेरा ढिड्ड अजें बिंद निं भरोआ। मड़ा दनां थम्मी रक्ख अपनी हिनकनी। ते खाई लैन दे मिगी पंज—सत्त कक्कड़ियां होर। छंदे तेरे मड़ा, दिक्खेआं इ'यां नेई करेआं, कुतै तेरी हिनकनी सुनियै खेत्तरै दे मालक इत्थै आई पुजदे तां हड्ड भन्नी टकाडन साढ़े।”

गिद्दड़ गलांदा “बो भाइया एह नेइयां थम्होंदी हून” ते जोरें—जोरें हिनकन लगी पैदा ऐ। गिद्दड़ै गी हिनकनी सुनियै मालक डांगा—सोटे लेईयै खेत्तरै च आई पुजदा न। मालकें गी औंदा दिक्खी गिद्दड़ इक्कै सरुट बटदा ते खेत्तरै चा ब्हाऽ होई जंदा ऐ। ते बचारा अद्ध रज्जा ऊट

मालकें दियें डांगें दा शकार होइयै अपने हड्ड भनाई छोड़दा ऐ ।

ते जिसलै ऊट कि'लदा कि'लदा नदिया कंढै पुजदा ऐ तां उसगी गिद्दड़ बी उत्थै मिलदा ऐ । गिद्दड़ आखदा "भाइया, में गलाया हा ना, जे मेरी हिनकनी नेई लगी थम्होन । बो, तूं मेरी इक नेई सुनी, ते लै हून भनाई आयां अपने हड्ड ।"

ऊट गलांदा "यरा मेरी छोड़ तेरा ढिड़ ते भरोई गेआ नां । चल हून चलचै पारै गी ।" गल्ल करदे गै गिद्दड़ झट्ट उसदी पिट्ठी पर जाई बाँहदा ऐ ते दमें लगदे न नदी टप्पन । नदी टपदे-टपदे जिसलै ऊट अद्धबशकार पुज्जियै खड़ोई जंदा ऐ तां गिद्दड़ पुछदा "भाइया केह गल्ल होई गेई, खड़ोई कैसी गेआ ऐं ? "

ऊट गलांदा " केह आक्खां यरा मिगी बिलकनी लगी ऐ औन ते हून थम्होंदी नेई ।"

गिद्दड़ छंदे पांदा, रोंदा-करलांदा ऐ ऊट पानिया च बिलकन लगी पौंदा ऐ । ते गिद्दड़ गोते खंदा नदी च रूढ़ी जंदा ऐ ।

अभ्यास

प्र.1 हेठ लिखे दे प्रश्नें दे जवाब देओ :-

क). ऊट ते गिद्दड़ भुक्ख मटानै लेई कुत्थे जंदे न ते उत्थै जाइयै केह खंदे न ?

ख). गिद्दड़ दी हिनकनी कन्नै केह होंदा ऐ ?

ग). खेत्तरै च ऊटै गी रज्ज की नेई होंदा ?

घ). गिद्दड़ै गी खेत्तरै च कीती गे दी हरकत दा फल केह थोआ ?

ङ). हिनकनी ते बिलकनी चे केह फर्क ऐ ?

प्र2. स्हेई शब्दें कन्ने खाली थाहर पूरो :-

खडोई, कक्कड़ियां, बिलकन, कि'लदा—कि'लदा, ढिङ्ङ

क). ऊट ते गिद्दड़..... खानें गी खेत्तरें च जंदे न ।

ख). मेरा..... भरोई गेआ ऐ ।

ग). ऊटनदी कंढै पुजदा ऐ ।

घ). भाइया केह गल्ल होई गई,..... कैनी गेआ ऐ ।

ङ) ऊट पानियै च..... लगी पौंदा ऐ ।

प्र. 3. स्हेई जोड़े बनाओ :-

मेरो ढिङ्ङ भरोई गेआ ऐ खेत्तरै अंदर जाई बड़दे न ।

दमैं जने कक्कड़ियां ते हून थम्होंदी नेई ।

खाई लैन दे मिगी ते लै हून भलाई आया अपने हड्ङ ।

तूं मेरी इक्कनि'सुनी मिगी लगी ऐ हिनकनी औन ।

मिगी बिलकनी लगी ऐ औन पंज —सत्त कक्कड़ियां ।

प्र4. हेठ दित्ते दे शब्दें दे अर्थ लिखो ते उं'दे बाक्य बनाओ :-

मित्तरी, हिनकना, बिलकना, खेत्तर, सरूट, अद्धरज्जा

प्र5. अपने दादा—दादी कोला जां अपने माता—पिता कोला इस कथ

आंगर गै कोई होर कथ सुनो ते लिखो ।

अध्यापकें आस्तै निर्देश

इस कथ दे संदर्भ च विद्यार्थियें गी किश होर उदाहरण देइयै कुरीतें शा बचने दी प्रेरणा देओ ।

प्र.6. विलोम शब्द लिखो :—

थम्मना	
अद्दा	
जोरें—जोरें	
औना	
भरोआ	